

奏疏存藁卷之三

目次

控辭雲貴總督疏

報明被執滿漢官兵疏

題補松潘建昌兩鎮疏

題請川蜀司道疏

恭謝 欽賜弓馬疏

預籌進滇機宜疏

招撫建昌五衛地方疏



招撫永寧一帶地方疏

題報官兵守禦永寧情形疏

會議進勦機宜疏

建昌官兵堅守城池疏

查獲賊遺馬騾補給分賞疏

官兵應援永寧飛報大捷疏

獎薦僞員以勵後効疏

接任雲貴總督謝 恩疏

密陳統馭官兵情節疏

永寧復敗逆賊大破勁敵疏

遵 諭再遣官兵堵勦疏

奏疏存彙卷之三

控辭雲貴總督疏

奏爲

聖明寵命自天微臣措躬無地謹據實引辭以安愚  
分以重巖疆事康熙十九年二月十六日准吏  
部咨文選清吏司案呈奉本部送吏科抄出本  
部題前事康熙十九年正月二十七日奉

旨議政王貝勒大臣九卿詹事科道會推具奏欽此  
該臣等公會推得雲貴總督員缺於康熙十

九年正月二十九日奉

上諭雲貴係邊疆重地苗民雜處總督關係最爲緊要必得才猷超卓之人方克勝任將軍趙良棟謀勇茂著操守清廉雖係武員通曉文義改爲雲貴總督仍兼將軍必能綏靖地方安輯兵民著議政王貝勒大臣九卿詹事科道會議具奏欽此將趙良棟以勇略將軍授爲兵部尚書兼都察院右副都御史總督雲南貴州等處地方軍務兼理糧餉查雲貴總督舊

勅關防俱係綏遠將軍湖廣總督蔡毓榮收貯俟命下之日其新

勅吏部移揭內閣撰寫發出交與兵部馳驛速行移送其關防移咨綏遠將軍總督蔡毓榮速委能員轉送趙良棟舊

勅繳部可也等因康熙十九年正月三十日奉

旨趙良棟着以勇略將軍授爲兵部尚書兼都察院右副都御史總督雲南貴州等處地方軍務兼理糧餉寫勅與他餘依議欽此欽遵抄部送司相應

行咨案呈到部擬合就行爲此合咨前去煩爲  
欽遵查照施行等因到臣臣開讀之餘莫知所  
以伏念臣本邊鄙武人未嘗學問蒙我

皇上不以臣爲謏陋三任總兵再畀提督復加將軍  
而臣每懷蚤負深慮無以報稱有幸我

皇上知人之明如臣前任大同因清兵餉而遭衆忌  
更調天津重

畿輔以抑豪強六年之間氣血耗盡再寧夏變故  
時當緊急我

皇上方厯西顧之憂正臣子捐軀報効之日臣因馳  
驛兼程冒危直入其間安反側收人心擒元克  
正

國典皆行之於賊勢方張之會數月以來心力交  
盡且臣身歷疆場已四十載從前之傷勞過多  
方少壯時尚不自覺年過五十百病漸侵比年  
扶病藥食相半再去歲十月攻克密樹關進取  
徽州畧陽今春元旦破白水壩之險大敗青川  
之賊恢復龍安直下成都下獨枕戈擐甲履山

過水與賊步步爲敵而追賊緊急日行二百餘里筋力疲憊甚覺難支大非昔日可比及抵成都安插投降解散賊勢遣發官兵分佈勦撫漢土官員安戢兵民接見批答日無寧晷事益繁而食益少矣今則耳聽不聰目視不明肌膚銷爍鬚髮斑白不敢言老言病尚勉強支持者總以川蜀正在收復

君命爲重不知有身也今我

皇上復

特授臣以雲貴總督更荷

天語過分褒嘉即使微臣捐糜頂踵不足仰報安敢引辭惟是滇黔要地總督重臣實非衰老武人所可勝任伏乞

皇上鑒臣愚忠收回

成命使臣仍以原官統領原兵相機進勦以竟微臣仰報未盡之心庶

廟堂之上無濫予之恩榮而邊徼武臣亦得自安愚分矣臣不勝悚切待

命之至謹具奏

聞伏候

勅旨康熙十九年三月十七日奉

旨卿才品優長久鎮巖疆勞績素著簡任雲貴總督  
正資料理着祇遵成命不必控辭該部知道

報明被執滿漢官兵疏

題爲報明被難滿漢官兵事臣查張耀先高陞等  
二百六十八員名俱係八旗官兵苦獨力乃於  
康熙十三年盤龍山之糧受困暨十四年白土  
關事變兩番被難之人也陷身於賊中者六年  
雖未見害而中間拘繫防嫌之苦真不啻九死  
一生矣今成都旣復臣行令各鎮營并布政司  
於各該地方遍爲清查臣俱日給以口糧暫爲  
安插查此項官兵自應歸旗但蜀省正在用兵

或俟將軍臣俄克濟哈到日認明旗分統領或  
徑令來

京惟候

旨遵行除取具各官兵花名冊咨送兵部外理合具  
題再寶鷄益門鎮受傷被執靖寇將軍標下官兵  
季魁元等六十一員名哭訴羈禁情由亦皆堪  
憫且各去衣驗傷體無完膚臣知俱是堪以戰  
陣之人請暫留軍前給以衣甲馬匹什物隨征  
爲

國効力臣未敢擅便伏乞

皇上睿鑒勅議行臣遵奉施行康熙十九年三月十  
八日奉

旨兵部議奏



題補松潘建昌兩鎮疏

題爲請補新復要地重鎮急爲整頓以備征勦以  
奠巖疆事查臣以川省新復遵照舊制請將松  
潘建昌二鎮速爲設立官兵并永寧仍改總兵  
等緣由已經具

題在案除永寧一鎮應否復設總兵候

旨遵行外如松潘乃極西要地建昌逼近雲南總兵  
一官必須幹才夙將老成練達之人方克勝任  
而總兵員缺例應候部推補請

旨欽定但蜀疆初復需才甚急臣既不敢越分妄  
題使偏裨之將驟膺大任然亦不敢緩待有誤軍  
機大事臣查新補福建興化總兵官高鼎膽勇  
素著廉介持心前署花馬池副將頗見其效及  
隨臣征防鳳翔愛恤士卒調度合宜今興化總  
兵員缺閩省題

請有人而高鼎正在候補合無改補松潘鎮總兵官  
於新復地方大有裨益再鞏昌城守副將馬山  
忠誠謹厚沉毅有勇臣於十七年自秦州旋師

路過鞏昌接見之間知非常品且係十三年揀  
選陪推過總兵員缺之人臣請補授建昌鎮總  
兵官不獨防勦有賴亦可爲心腹之寄以上二  
員所當急請用於新復地方以奠巖疆以收實  
効者也倘蒙

俞允臣更請將總兵高鼎

勅令馳驛星速前來整頓兵馬料理地方急備征勦  
臣未敢擅便伏乞

皇上睿鑒勅議速覆施行康熙十九年三月二十二

日奉

旨兵部議奏

題請川蜀司道疏

題爲特舉所知司道恭請就近補授急備糧芻以資進勦事竊惟四川乃滇黔門戶秦楚藩籬而成都省會沃野千里古稱天府之國自明末張獻忠蹂躪人民殺戮已盡城郭荆棘村社丘墟迨我

朝定鼎三十餘年以來生聚培養稍有起色然元氣尚未盡復而又值吳逆構亂荼毒六載橫徵暴斂百法搜求民之流離不堪言矣雖臣仰體我

皇上好生之德所至地方秋毫無犯然甫出水火必須加意撫綏况雲貴未下大兵屯集輸將輓運更藉民力司道知府非得循良素著之人無以資保釐而辦

國事今布政司雖

題補有人久在保寧尚未抵省任事而按察司署布政司事董定國係投誠之員尚未授職終覺呼應不靈不獨臬司一官法紀總司當大變之後人心澆漓明刑弼教不可乏員而軍興旁午

糧芻供應浩繁勢必多員協同料理查陝西涼莊道金星賁才優經濟氣宇老成於去年十月初二日自清水統兵起行以至克復徽州畧陽陽平平慶道龔榮遇推病不前糧料積欠竟至七十餘日該道接代之後甫一月盡行補足及臣由陽平渡白水壩該道親身督運源源接濟可謂急公臣請補授四川按察司協辦軍需又岷州撫民同知傅作楫延安神木同知劉得弘青年英敏皆係旗員督運軍前著有勞績臣請

將傅作楫補授建昌道劉得弘補授永寧道俱令暫駐省城措辦大兵糧料再進定雲南建昌永寧兩路用兵二處急須預備行糧如建昌一路行糧自在成都供給永寧一路行糧當由保寧仍藉秦省輓運庶克有濟若不急設專員恐致貽誤軍機况三員皆現在軍前供辦糧芻勤劬盡職以之就近補授司道非徒取其才能實以酬其前勞而勵後効也至於成都知府乃一郡首領當百務肇興之始必得才智超衆之人

方能振刷查寧夏安定堡守備陳陞老成練達奉職惟謹連年隨臣征防及今進勦經支大兵糧草在在清楚且係科目出身頗諳治體臣請改補成都知府才品相當使其就近供辦大兵糧餉整理地方可稱任使臣以兵糧有關軍機重務起見倘蒙

俞允則新復巖疆可收得人之效而進勦駐防兵糧亦不致於匱乏矣臣未敢擅便伏乞

皇上睿鑒勅議速覆施行

奏疏存案  
卷之三

Blank columns for text in the right section.

恭謝 欽賜弓馬疏

奏為

聖明寵錫疊優微臣撫躬慚愧謹具疏恭謝

天恩事康熙十九年二月二十五日蒙

皇上特遣侍臣吳黑暨臣子廕生趙弘燦至蜀口宣

溫旨并

賜臣弓一張馬六匹臣卽郊迎入署恭設香案望

闕叩頭謝

恩訖竊念

奏疏存案  
卷之三  
三

大內彤弓天閑上駟稽之古典原出  
朝廷重有功而錫元勳微臣何能敢邀  
異數且

特命臣子就便省視使臣得遂舐犢私情是我  
皇上重念邊臣

寵眷愈隆而微臣捐糜益切難報矣謹奏  
謝以

聞康熙十九年四月二十一日奉  
旨該部知道

預籌進滇機宜疏

密題爲微臣謹遵

天語敬陳愚忠仰祈

睿裁事竊臣荷蒙我

皇上格外仁慈恩加無已除另疏叩謝

天恩外而臣子復宣

聖諭如臣有所請准密疏奏

聞仰見我

皇上下體邊臣無所不至念切封疆

睿慮周到臣之愚忠既邀

聖明洞鑒則下情無可陳無可奏矣惟有乘此餘年

竭蹶駑鈍報答

高深當此滇黔未下逆孽未靖人臣分當滅此朝食

敢以淺見爲我

皇上一一陳之查滇黔所恃者以四川爲捍蔽有四川則滇黔有所恃無四川則滇黔無所守是滇黔之得失全在四川今四川既爲我得彼逆賊所處之境地猶人之無肩臂屋之無牆垣焉能

持久且吳三桂死後餘孽中惟有一吳國貴尚  
可支撐今國貴復死則彼中無人矣至吳應期  
胡國柱輕佻小人素不服衆郭壯岡原未經事  
不堪大任即使老成之將練達之才此時此際  
亦難爲之收拾况兵無餉而不戰民懷怨而離  
心馬寶王會高啟隆反覆不常事急則自爲身  
謀之不暇又何足慮且吳世璠已退回雲南其  
心虛膽怯又可槩見矣胡國柱留貴州馬寶等  
在辰沅武岡不過勉強支持湖廣大兵一加努



力賊自奔逃是湖廣官兵應請

勅限以立取貴州廣西泗城州於入峇河過渡乃昔年固山招不太進兵之路由安籠出雲南之交水又廣西思南府走八礮青羊江過渡由廣南府出雲南之維摩州四川成都府走黎雅天全招討司過大渡河卽瀘江由建昌會川金沙江出雲南之武定府又四川保寧府下重慶或走七星關或走永寧俱適烟方堂堂可渡橋出雲南之霑益州以上川廣四路官兵限以立取雲

南如成都至建昌二十站建昌至雲南又二十站官兵於成都起行時可帶二十日日糧至建昌再支二十日日糧以上糧米應在成都敘府瀘州預備蚤爲運送其保寧一路兵糧當借順江之便可下重慶應於保寧各兵按日帶糧至重慶又於重慶按日支糧此又在統兵將軍等酌定倘保寧重慶遵義民未流離尚可備糧不用秦省接濟又在彼處文武酌定如此則兵不之食踴躍前進民無驚擾地方安堵惟是逆渠

藩下舊卒皆同休共戚之輩起釁構亂之人當此退無可退守無可守妻子在滇不降則惟有拚命死戰猱猱苗蠻得其心爲我用失其心爲彼助不可不備亦不可不籌今滿洲馬匹甚是瘦弱內侍臣親見而建昌永寧重慶無糧不問可知若曰養馬轉盼夏初南方烟瘴之地不第炎熱人馬生疾抑且陰雨連綿江河水大難渡若曰到處尋糧不獨大山深林無糧可尋抑恐一失蠻犇之心處處皆賊矣况兵貴神速要在

人強馬壯兼以天時地利一發卽到一到成功使賊莫敢當不能敵庶得有濟若不預爲籌定到處假以尋糧放捨託以馬瘦遷延一失軍機究何裨益與其速進不若緩進此又微臣鯁鯁過慮不得不一併預爲陳明於我

皇上之前俯賜

睿裁者也倘臣言不謬請

勅諸臣嚴督滿漢官兵上緊喂馬四川陝西督撫司道急急備糧沔廣廣西統兵將軍實切整兵會

定日期於八月終各路一齊進發直搗雲南賊  
自瓦解庶出萬全至禁止搶掠原以重民生而  
培元氣懷遠人而服蠻彝不令一夫失所此固  
人人能言及至實實奉行民已不堪命矣想亦  
難逃

聖明洞鑒臣又不得不重爲陳

奏仰懇我

皇上嚴綸再加申飭蚤恢疆土者也以上條奏雖出  
臣之愚昧然皆因時酌宜真知確見之事非敢

以泛言臆說而貽

君父南顧之憂也緣係遵奉

天語密陳進勦機宜事理伏乞

皇上睿鑒全覽施行康熙十九年三月二十三日奉  
旨這所奏進兵機宜最爲緊要議政王貝勒大臣會  
同速議具奏

招撫建昌五衛地方疏

題爲再報微臣屢遣官兵招撫過建昌五衛地方已抵會川直逼金沙江情形仰慰

睿懷事竊臣先遣投誠遊擊冶國用費重振溫光顯陳世虎續遣遊擊馬登仕守備葉自昌并再發叅將呂自魁遊擊鄭有榮投誠總兵胡振雄前後共帶官兵二千前去建昌一路招安地方相機勦撫去後除節據各官塘報招撫過黎雅天全漢土官員暨建昌鎮道差員繳印繳劄投誠

緣由俱經前疏

題報外今於三月初二日據投誠總兵孫佳報稱  
卑職雖身受僞職心戀

關廷自大兵臨境已將被脅情由并建昌文武僞印  
九顆僞劄二十四張當卽差官齎繳訖所有建  
昌鎮屬營汛如峩邊黎雅就近歸誠各官印劄  
自行報繳寧越冕山越雋化林四汛亦俱歸正  
其僞印十一顆僞劄三十九張移交叅遊治國  
用費重振等彙轉至會川乃滇蜀接界要隘又

探得賊兵有渡金沙江之語卑職星夜催調冕  
越寧黎各路官兵並遣發職標三營遊擊劉登  
賢何鳳岐宋之蘭等同本將軍發到官兵前去  
相機堵禦外理合報明等情三月初四日又據  
該總兵孫佳報稱會川僞遊擊楊春明差把總  
蔡二前來歸誠齎繳會川營衛所學經歷僞印  
五顆僞劄九張一併移交差官轉繳外緣係帶  
兵率土投誠五衛悉歸版圖事理理合詳明同  
日又據臣原遣遊擊治國用等報稱卑職等統

領官兵前於二月初九日抵建昌所有招撫到化林寧越越嵩冕山各衛所官員印劄卑職等印逐一造冊專差呈繳今於二月十五日兵抵會川投誠營衛所學經歷等官繳到偽印關防六顆偽劄十一張卑職等查收彙繳至於金沙江已會遣官兵前去俟有的確情形另具塘報等情繕疏聞於三月初六日復據總兵孫佳遊擊冶國用等公同塘報內稱會川營衛官員投誠及發兵前去金沙江卑職等已經具報在案

今據自雲南貿易客民稟稱正月二十三日自雲南起身偽線將軍於正月二十日先發一箇將軍四箇總兵領兵萬餘駐劄馬街子聽得建昌已經投順又發一箇將軍姓謝帶四箇總兵不知有多少兵馬的於二十六日起身要過江由建昌入川偽洪化於二月初四日自貴州起馬回滇郭將軍夏將軍隨來胡將軍留守貴州等語卑職等復添撥官兵前去金沙江堵禦俟另有情形再爲馳報各等情到臣臣卽飛檄各

官嚴加把守江口靜候調遣外該臣看得建昌  
乃全川極南重鎮會川接界雲南爲進定滇省  
必由之路大渡河象嶺最險最要從來得之不  
易臣先遣官招安繼發兵勦撫今黎雅諸土司  
俱降大小象嶺瀘江建昌會川五衛俱爲我有  
而逆賊所恃所守唯一金沙江耳除進兵機宜  
臣已另疏

題奏外所有各土司印信號紙蚤請

頒發已經具疏而總兵孫佳不獨首先歸誠抑且調

度官兵招撫地方爲

國効力更不可泯并黎雅會川冕越鹽山等營亦  
不便遽爲委官臣俱准其照舊管理營汛把守  
江口堵禦逆賊仰懇

聖明勅下從優議敘一以備進滇鄉導一以開招徠  
之門則滇黔諸逆聞風來歸恐後矣其繳到僞  
印僞劄容臣彙齊造冊另繳相應具

題伏乞

皇上睿鑒勅議施行康熙十九年四月初二日奉

奏疏存案  
卷之三  
三  
旨覽卿奏遣發官兵招撫到黎雅諸土司建昌等五  
衛俱繳印劄歸誠可嘉着議奏該部知道

招撫永寧一帶地方疏

密題爲再報微臣遣官招撫永寧一帶地方以及  
鎮雄土府納款并報逆賊出犯情形仰祈

睿鑒嚴勅事竊臣前於克復成都之後卽遣遊擊閻  
成虎宋明賢楊啓龍等前去敘永一帶招安續  
遣臣標左營遊擊龔玉柱投誠遊擊楊嘉珍等  
帶領官兵隨後相機勦撫又遣蘭州營守備陳  
英投誠叅將蘇虎帶兵撒塘接應查白敘府文  
武歸正後卽行投誠總兵李芳述副將王之俊



并遊擊龔玉柱等前去永寧招撫去後除節據各官塘報招撫敘府馬湖所屬地方州縣營汛各官繳印投誠緣由俱經前疏

題報外今於本年三月初八日據遊擊龔玉柱等稟報蒙遣卑職等帶領官兵勦撫地方所有招撫到敘州馬湖二府屬偽鎮道文武并重慶偽知府王化賢巴縣偽知縣王尚義偽川北道何呈秀等共繳到偽印關防條記二十一顆偽劄一百五十九張已經差官齎繳訖今永寧文武

投誠繳到偽印七顆九姓土司偽印一顆瀘州偽印一顆偽劄一百零六張公同遊擊閻成虎查收責差親丁閻定國永寧把總楊成美亦於二十六日齎繳在案等情復據遊擊閻成虎稟報冊造僉同本日又據永寧投誠偽總兵汪時瀕報稱卑職一介庸儒原係偽將軍汪文元之姪不受偽職心懷

聖恩久欲歸誠中多牽制有偽總兵高元烈自本將軍大兵克復成都之後心恐膽怯常慮人心有

變又聞敘府文武投誠大兵臨境遂於二月初六日同僞左營遊擊趙邦英僞虎牙將軍韓天福四川僞布政魏峻逃奔卑職亦被拘禁若非三標官兵站隊卑職幾遭陷害兵民以高逆奔逃地方無主人心驚慌懇請卑職暫攝永鎮事務卑職不得已而暫從所請以安衆心隨公議差副將郭騏遠迎大師出民水火初七日恭值本將軍差官閻成虎宋明賢楊起龍齎捧勅諭告示臨永卑職率領闔屬官紳士庶跪聽

皇仁無不歡忻感悅卽於本日諭令軍民剃髮除僞永寧鎮總兵高元烈印劄携以逃去卑職劄付辭不受職當卽具繳外今呈繳永鎮中營遊擊僞關防一顆敘永管糧同知僞關防一顆敘永儒學僞條記一顆建武儒學僞條記一顆貴州永寧衛僞印一顆經歷司僞印一顆儒學僞印一顆總管勁武永鎮勇勝四標各官劄付共一百零六張交給本將軍差官閻成虎同本標把總楊成美呈繳外其永鎮各路文武印劄俟繳

到之日另文差繳再卑職於十三日令右營遊擊段尚秀帶兵五百名齎捧

膽黃三道本將軍告示三道前去招撫貴州赤水畢節等處據赤水衛僞守備吳邦欽畢赤營守備周化龍平大黔威道僞中軍守備高定邦赤水衛教授范宗鎬等繳到僞印二顆僞劄三張亦交差官閻成虎轉繳外其官士軍民俱皆剃髮歸正等情又據遊擊龔玉柱報稱二月二十四日據貴州畢節衛士民章炳宋蓋臣等四人前

來敘府請討招安卑職一一安慰再抄發告示前去靜候大兵到日率衆歸誠俟有繳到印劄另具稟報等情初十日又據各官差人引到鎮雄土知府隴天成古藺長官司隴氏差目把人等前來成都納款臣卽頒賞并發給劄諭告示令其速爲呈繳僞印號紙前來外本月十一日復據該總兵汪時灑飛報內稱前招撫到赤水衛守備吳邦欽周化龍平威道守備高定邦儒學教授范宗鎬等到永授誠繳劄卑職隨令回

衛安撫百姓催辦糧草去後復於二十六日據守備吳邦欽等回永報稱卑職等途至普市據赤水衛來人張二報稱有貴州僞將軍發兵撒塘徑抵赤水卑職等是以不敢前回伏乞發兵堵禦等情又於二十七日據防瀘把總郭勳報稱有僞黑將軍帶兵扎生界壩遵義府有陶將軍同城守營劉總兵扎城內有胡將軍尤將軍扎城外等情到職據此卑職卽挑撥官兵一面偵探一面分防要隘俟有確情另具稟報等情

同日又據該總兵汪時瀕報稱本年二月二十七日據龍場營都司管把總事黃尚賓報稱卑職於二月十二日差兵吳啓等前赴生界地方探聽僞兵情形去後本月二十五日據吳啓等回稱探聽得夏額駙遣牌上云發兵三萬聽其百姓探說止有一萬六七千有餘現駐遵義府又發僞兵三百餘名現駐生界壩又探得僞總管吳將軍之子在遵義一帶地方招集散兵等情該卑職一面復差兵丁夏連前往遵義府地

方探聽去訖俟探兵回營另爲具報同日又據黃尚賓報稱本年二月二十五日亥時據屯目任望龍報稱於本日未時據莫得管事人到龍處供稱我民運糧至大定府偶遇王將軍發兵三千到畢節將運糧百姓十三名拉去擡大砲到畢節口云要打永寧城後有蔡將軍大兵陸續進發等語理合具報等情該卑職亦卽遣發官兵探聽堵禦倘有情形立爲飛報方敢請發大兵等情各報到臣除臣飛檄該總兵嚴守地

方并行遊擊龔玉柱校誠總兵李芳述等速統官兵前去接應十三日又據該總兵汪時瀕塘報據原差官何兆圖稟稱探得威寧一路存城賊兵約有萬餘又有畢節逃難鄉親云僞鎮高元烈接雲南送來重夔將軍印狼心不悛欲練兵復取永寧已遣逆兵至赤水南關安塘聚糧等情又據仁懷營校誠都司管千總事馬雲稟報據差兵吳啓貴報稱有僞總兵毛友貴領兵一千已抵土城一來搶掠瀘合仁懷等處又僞

楊將軍領兵由重慶一路出犯永寧等語十四日復據該總兵汪時瀨飛報內稱本年三月初九日據副將郭騏遊擊陳應先偵探回永報稱逆賊塘馬百餘撒至滴水離永二十里老營下在落窩離城三十里至申時又據偵探兵丁報稱逆賊已到乾溪正南橋扎營離永城止有二十里卑職即分撥官兵上城守門嚴加隄備木日晚有偽勁武將軍標下投誠副將王之俊到永口稱奉勇畧將軍牌行令李總兵龔將官等

帶兵前來永寧已於本月初八日自敘府起身除俟李總兵龔將官官兵到日卑職等協同守城堵禦但逆賊勢重懇乞本將軍再發官兵救應等情又據總兵李芳述等稟報內稱卑職等帶領官兵於本月初八日自敘府起行途遇前差去與偽侍衛劉將軍投書兵丁稟稱有偽毛總兵領馬步逆兵千餘前來永寧又有偽尤將軍領猓猓兵三千餘名從樂用寨出仁懷由瀘州亦來永寧各等情到臣臣一面飛檄該總兵

李芳述遊擊龔玉柱等到永之日併力固守城池相機堵勦一面復遣遊擊屠存義守備孫國祥復帶領馬兵一千星馳前往應援又慮永寧無糧隨遣署永寧道事劉德弘速去瀘州催運外該臣看得永寧乃黔蜀接界漢土雜居過畢節由水西烏撒出烟方可以直下雲南爲兩省最要之地是臣前遣官招安繼發兵勦撫原以備兩路進征如僞總兵汪時瀨以僞將軍汪文元之姪不受僞職保全城池雖無劄印率衆投

誠順義可嘉且逆賊出犯努力支持尤見才幹  
臣叩懇

皇仁將汪時瀨從優議敘以示激勸而僞川北道何呈秀重慶僞知府王化賢巴縣僞知縣王尚義等官兵未到重慶帶印越境來歸尤爲順義容  
臣另疏

題敘所有前後繳到僞印僞劄查明彙繳至臣前遣總兵李芳述遊擊龔玉柱帶兵勦撫繼發遊擊屠存義守備孫國祥帶兵接應俟另有情形

再爲

題報惟是遵義乃財賦之鄉一府錢糧等於八府  
既接連重慶爲進征川東官兵所指之地豈可  
竟置不問反資貴州餘孽之糧仰祈

聖明嚴勅諸臣就近急取遵義湖廣統兵將軍速進  
貴州臣等兩路官兵廣西兩路官兵直下雲南  
各當努力蚤奏蕩平緣係再報招撫永寧一帶  
地方鎮雄土府納款并請急取遵義暨逆賊出  
犯情形事理貼黃難盡伏乞

皇上睿鑒全覽

勅議施行康熙十九年四月初七日奉  
旨議政王貝勒大臣會議具奏



題報官兵守禦永寧情形疏

題爲逆賊窺犯永寧官兵奮勇擊敗謹恭報守禦情形并繳逆書僞文仰祈

睿鑒勅議事案查前據授誠總兵汪時瀨塘報逆賊窺伺永寧已至正南橋扎營臣飛檄總兵李芳述遊擊龔玉柱等速速前去併力固守堵勦并遣遊擊屠存義守備孫國祥等帶兵一千星馳應援緣由經臣前疏

題報在案三月十八日據總兵李芳述遊擊龔玉

柱等塘報內稱卑職等遵本將軍令牌於初八日統領官兵自敘府起行途遇永寧汪總兵差官報稱永寧有賊出犯緊急請兵救應等語卑職等聞報卽晝夜兼程於初十日四更進城正與汪總兵計議戰守事宜據塘馬飛報逆賊大隊前來離城不遠卑職等於黎明統率官兵出城迎敵見逆賊馬步約有三四千俱打黃旗一股從真武山梁站隊一股由準提庵站隊左右并出一股在真武山對門尖山頂上憑高視低

窺我城內出入卑職等原議留汪總兵并管糧同知王存肅帶領兵民守城卑職總兵李芳述遊擊龔玉柱親帶馬步官兵亦分三路對敵自卯至午鏖戰多時各官兵奮勇直前并鳥機百子砲齊發逆賊不能抵敵大敗陣斬甚多活擒一十三名帶傷不計其數我兵追至乾溪因天氣炎熱又兼人馬連夜前來隨到隨戰甚覺疲乏只得收兵回城休息得獲馬二十二匹鐵甲十四副并鳥鎗旗幟所有生擒逆賊一十三名

專差押解今將克捷情由理合塘報等情二十一日復據總兵李芳述等報稱本月初十日撲勦逆賊克捷情形已經塘報在案十一日據偵探兵丁回報敗遁逆賊仍在滴水下營賊兵漸漸增添十二日又據投誠僞兵徐成張義供稱逆賊在滴水扎下等畢節各處兵到欲要復來攻取永城其陝西各處退回之兵僞黑將軍僞楊總兵收集帶領在永寧地方大村駐劄又說僞洪化因永寧乃雲南貴州要路必定教尤將



軍們取了永寧把守纔好等語卑職等查得永寧一隅之地城分川黔河水當中城垣地勢落低城外週圍山勢高聳且城池傾頽兼之道路又多四通八達今逆賊如此狂逞我兵單弱又永寧糧米倉廩通無積貯卑職等一面分佈官兵嚴加提備一面請兵之間於十三日午時逆賊復來城外三面下營馬步逆兵較前過倍係僞將軍尤廷玉高元烈等統兵卑職等因衆寡不敵不便迎戰卽令官兵上城總兵李芳述守

貴州城遊擊龔玉柱守四川城一應兵民分把  
兩城堞口至十四日五更時分逆賊擡雲梯二  
十餘架四面攻城我兵鎗砲交加至天明賊兵  
稍退卑職等惟固守城池俟接應兵到即便出  
城大戰懇祈迅發大兵以便撲勦今有故僞將  
軍劉之復長子劉沛武於三月十一日與蔣鄒  
二總兵及職述三人書一封內中所言愚惑人  
心合將原書呈覽等情到臣臣復遣副將楊  
虎遊擊吳志等統兵二千兼程前去應援本月

二十五日據該總兵李芳述遊擊龔玉柱差  
泉營千總李見龍永寧千總李旺押解到陣擒  
逆兵李長壽鄭國清等一十三名臣卽會同建  
威將軍臣吳丹振武將軍臣俄克濟哈等齊至  
公會之所審訊逆賊情由據各逆供稱伊等俱  
係僞廖將軍營兵原在巫山逃了至遵義被僞  
胡將軍陶將軍攔住每人與了四錢八分銀子  
着跟僞尤將軍前來攻取永寧三月初十日彼  
大兵殺敗領兵的是尤將軍并毛徐二總兵兵

有三千餘名馬有五六百匹後頭來的兵我們就不知道了遵義有僞胡將軍僞吳三將軍僞趙將軍共有兵四五千象六隻生界壩係黑將軍領兵駐劄等語臣等仰體

皇上好生之德摘取口供一槩免死令其剃髮以示寬仁二十七日又據該總兵李芳述等稟稱本月十四日有永寧僞總兵高元烈今授僞永寧將軍送文書一封插在南門外卑職請龔將官公同取來拆看高元烈與卑職書札俱係狂言

且稱與卑職齎有顯武左將軍印信令卑職就中內應等語同日僞將軍尤廷玉着人又來大東門外射箭二枝亦同龔將官取看一係尤廷玉與李鄒二總兵之書一係僞兵部之文意在煽惑卑職誓圖歸正一點愚誠斷難搖動今將原書原文共三件一併呈覽等情到臣該臣看得永寧接界滇黔最屬緊要在我之所必守在賊亦所必爭而原進川東官兵將遵義一府未取以致逆孽敢於侵犯雖被我兵殺敗大挫其

鋒然尚未退應俟援兵捷報前來另爲

題報仰慰

聖懷至總兵李芳述前拒僞命不奉僞勅率衆投誠  
順義可嘉今復回守孤城不惑餌誘堅貞不渝  
臣叩懇我

皇上破格加恩以示激勸而進定雲貴該總兵可爲  
前導矣除前後出首僞書三紙僞文一紙詞語  
狂悖咨送兵部外相應具

題伏乞

皇上睿鑒勅議施行康熙十九年四月二十六日奉  
旨兵部議奏

會議進勦機宜疏

密題爲乘機三路進兵以滅賊寇事案准兵部密  
咨前事內開該議政王等會覆建威將軍吳丹  
題前事康熙十九年正月二十五日題二月初  
七日奉

旨議政王貝勒大臣會議具奏欽此該臣等會議得  
建威將軍吳丹疏稱臣等整齊大兵平定雲貴  
一路由遵義府一路由敘府進取雲貴一路由  
建昌進取雲南若令綠旗將軍四川提督等進

兩路臣吳丹統領滿洲大兵亦由一路進取雲南是賊寇敗滅皆關此三路進兵再令將軍噶爾漢親身并官兵調赴漢中京城每佐領或發四名或五名亦赴漢中再將在陝兵馬於臣回進滿兵增足每佐領護軍及披甲驍騎兵八名餘剩官兵以每佐領五名令一將軍鎮守成都又蒙古兵丁缺乏馬匹應撤回亦令鎮守漢中此進勦之三路兵馬令其自成都裹糧於所到地方覓食民糧俟將同臣進取雲貴之兵調齊

令其喂馬而行又將軍王輔臣親身并伊標兵陝西總督哈占本身并標兵似應令其同臣一路於四月內進取雲南請

勅進川綠旗將軍大臣四川提督等以一大臣防守地方令二大臣各由一路進取雲貴此進兵之時將總兵官朱衣客費雅達高孟於伊等所進二路各聽酌帶一員尚有總兵官一員令守保寧可否前進令伊等議明若可進則三路進兵以何大臣由何路前進之處伏候



欽定等因查近奉

上諭成都保寧俱已恢復乘此機會卽宜速定雲貴宜令順承王準達貝子都統范達禮盡統伊屬兵馬逆江而入恢取重慶順承王等卽駐鎮重慶令將軍吳丹俄克濟哈與將軍總督趙良棟等公同進取雲貴其進取雲貴之時聽將軍吳丹俄克濟哈將順承王準達貝子范達禮等兵內揀選精銳有馬者帶去令總督楊茂勳提督王之鼎駐守成都令將軍王進寶駐鎮四川地方將徐治都撤回

彝陵鎮守彝陵荊州等處令大將軍公圖海鎮守漢中欽此通行在案

上諭俱已周到其請將鎮安將軍噶爾漢本身並官兵調赴漢中自京遣發每佐領兵四五名及將在陝滿兵增入伊等進川兵內餘兵交一將軍鎮守成都之處均無庸議至總督哈占經理漢中四川大兵糧餉將軍王輔臣兵馬近又撤回漢中同大將軍公圖海鎮守地方其哈占王輔臣之處亦無庸議蒙古兵丁應如所題發回漢

中其總督哈占標下官兵及費雅達等各總兵官等親身并伊等標下官兵作何調往以及作何留守地方之處聽將軍總督趙良棟與將軍吳丹俄克濟哈等公同確商而行其進定雲貴兵馬關係最要應令巡撫杭愛布政司劉顯第等作速前去料理供應今將軍王進寶吳丹等兵馬又已恢復四川順慶府四川總督楊茂勳兵馬已入川境恢復巫山應行大將軍順承王貝子準達都統范達禮等文到之日卽迅進四

川遵奉前

旨作速恢復重慶酌量平定地方撫綏黎民駐劄鎮守至於三路進取雲貴及以何大臣由何路前進事宜將軍總督趙良棟將軍吳丹俄克濟哈等身在地方所知最確應聽公同確議一面酌行一面奏

聞可也等因康熙十九年二月初七日題本日奉旨依議速行今川省底定楊茂勳等坐去船隻俱屬無用運糧事務關係最爲重要着郎中蘇赫臣員

外郎噶爾薩將運糧事務親身專管以此船隻裝載楚糧逆江運至順承王軍前不得斷絕致誤軍中急需欽此欽遵密咨到臣今臣與將軍臣吳丹俄克濟哈公同確議得雲南乃逆渠巢穴理宜兵分兩路急急進取查建昌永寧直達雲南率皆苗蠻彝徠之鄉素稱不毛之地而進征官兵行糧須當籌備自帶庶不致有失蠻彝之心且程途窵遠滿洲馬匹甚是瘦損勢必加料喂養且轉盼仲夏南方烟瘴之地酷熱難當更兼陰

雨連綿江河泛漲過渡甚非容易理勢應在仲秋方可進取如成都雖係省會然地方殘破有年州縣民稀現今供應日支糧料不敷若進征行糧斷難令其供應兩路今擬建昌一路官兵行糧應成都所屬并邛雅嘉眉等州運送永寧一路官兵行糧應藉保寧川江直達敘府之使仍用秦省之糧船隻運送永寧一路原進川東漢兵在保寧順慶二處就糧養馬惟是遵義一府未取以致遵義之賊侵犯永寧臣已三遣原

進川西一路漢兵撲勦矣而雲南之賊出犯建昌臣亦已三遣原進川西一路漢兵星馳前去堵禦矣臣等復議得四川總督已抵重慶而原進川東一路漢兵亦有分駐重慶者乘滿洲喂馬之間應令督臣楊茂勲官兵并駐重慶副將楊宗道官兵合力就近相機勦撫遵義而提督臣王之鼎帶領本標官兵去永寧接應前發川西官兵協力撲勦俟交秋後行糧備辦馬匹贍壯如遵義已取湖廣官兵已入貴州臣等兩路

西

官兵仍照前議直搗雲南倘遵義不能取湖廣官兵不能進貴州臣等兩路官兵中或分一股取遵義下貴州再議進定雲南或分爲三路一時并進軍機難以預定至期另爲奏請至破賊全藉兵力陝西綠旗官兵八萬應留四萬守汛進定雲貴應須秦省綠旗官兵四萬方克有濟此雖臣前疏奏請而陝省綠旗官兵聽臣等調遣又奉有大將軍以身任之萬勿稽誤之

旨合再

奏明懇

請緣係題報會議進勦機宜事理貼黃難盡伏乞  
皇上睿鑒全覽

勅議施行康熙十九年四月二十一日奉

旨議政王貝勒大臣會議具奏

建昌官兵堅守城池疏

題爲建昌官兵戮力堅守城池謹恭報擊賊情形  
仰祈

睿鑒事竊臣自克取成都之後遣發官兵招撫過建  
昌鎮道以及五衛地方官員繳印繳劄投誠并  
逆賊巨萬欲渡江窺伺建昌飭令各官堵禦等  
緣由經臣前疏

題報在案本年三月二十日據叅將呂自魁遊擊  
鄭有榮總兵胡振雄孫佳等塘報內稱卑職等

自抵建昌招撫會川卽議副將冶國用費重振等帶領官兵前去會川并令會川投誠遊擊楊春明就近撥兵協同堵禦江口卑職等一面安撫各土司一面整頓兵馬會商前進三月初十日辰時有副將冶國川費重振星夜到建口稱三月初七日行至地名五里坡有會川守江兵丁奔回隨後逆賊塘馬五百餘騎前來遇我兵廝殺陣斬逆賊數名得獲大旗一桿會川兵丁竟不出力各自四散隨後拏獲逆兵一名搜出

公文一角拆閱乃偽將軍劉起龍與會川遊擊楊春明之逆書並招集散兵偽勅諭牌票又詢逆兵供稱領兵的是偽將軍劉起龍帶五個總兵兵有萬餘江上是楊將官暗約放過來的等語我等見賊勢猖獗會川官兵不戰而退會川必有變故是以卽回會川將遊擊楊春明父子一同牽伴前來請速發兵堵禦等情除將遊擊楊春明撥兵看守訖卑職等公看得建昌乃緊要重地存城不過留守之兵千餘業已分發各

路堵禦甚是空虛議留副將呂自魁帶領官兵  
守城總兵胡振雄統領官兵星馳前去堵禦總  
兵孫佳副將鄭有榮繼後接應但賊勢甚重實  
爲衆寡不敵又迷易所通德昌北勝州由鹽井  
兩路之賊俱可適建昌我兵自是首尾不能相  
顧更慮建昌兵少城垣傾塌難以固守不若收  
集官兵共守建昌爲妥今專差遊擊吳化龍馳  
報惟候大兵到日以便奮力勦殺等情又據遊  
擊吳化龍口稟僞將軍劉起龍原在建昌做過

總兵不得人心與孫總兵胡總兵安土官俱不  
相和好各官有誓守孤城之心只是兵少又城  
中無糧可慮只望速發大兵等語臣卽遣發總  
兵王好文遊擊趙光榮等帶領官兵二千星馳  
應援并預發接誠官兵兩個月餉銀暨委官帶  
銀前去召買米糧接濟軍需三月二十四日臣  
前遣招撫副將冶國用等至省稟稱逆賊萬餘  
將近建昌城中各官兵民與土司副將安泰寧  
心切滅賊合力共守城池但城中無糧恐不能

持以故令卑職星馳前來請發大兵再懇設備糧餉等語二十五日又據叅將呂自魁等飛報內稱本月十八日逆賊萬餘帶火器數千侵犯建昌四面攻圍又逆賊詭謀多端用赦書黃旗招誘建兵令拏卑職并孫總兵以作內應伏乞迅發大兵則建城軍民或可生全等情臣於本日卽復遣總兵王進才副將柴英遊擊趙元輔等統領精健前鋒馬兵二千名兼程前去撲勦并頒發衣帽緞疋銀牌等項仍令治國用前去

傳諭各官兵加意固守并撫賞土司官兵以鼓其心去後四月初一日復據叅將呂自魁遊擊鄭有榮總兵胡振雄孫佳等塘報內稱三月十八日逆賊萬餘侵犯建昌前經稟報在案本月二十二日逆賊用雲梯五六十架四面爬城分四股頭子一股攻東門一股攻南門一股攻西門一股攻西北角蜂擁齊來卑職等預爲籌佈先議副將呂自魁領本標官兵固守東門一帶遊擊鄭有榮建昌總兵孫佳同建昌道孫振元



各領本標官兵固守西門一帶隨征總兵胡振  
雄領本標官兵固守北門一帶建昌鎮標遊擊  
穆應奎王進忠各領官兵固守南門一帶冕山  
營遊擊孫炳煥黎雅營中軍守備王一豹各領  
該營官兵固守西北一帶建昌鎮標中左右三  
營官兵分撥四面協防今逆賊臨城四面齊攻  
官兵奮力堵禦鎗砲弓箭齊發木石交加自  
十二日寅時戰至二十三日未時打死逆賊官  
兵在城下者約有二三百名帶傷者不計其數

賊始退敗卑職等卽發馬兵出城奮勇追殺活  
擒逆賊三名奪獲大旗二桿小旗四桿九子砲  
六位烏鎗二百餘桿賊雖大敗然營盤尚在密  
山離城止五里賊衆我寡不便遠追又據生擒  
逆賊供稱僞線將軍統領賊兵前來接應蚤晚  
就到卑職等卽飭令官兵晝夜小心隄防其前  
拘禁遊擊楊春明父子因通逆請兵縱賊渡江  
雖經拏獲誠恐變生不測卑職等已審明口供  
當同各官兵斬首以鎮地方訖懇乞速發大兵

接應爲此理合塘報等情到臣該臣看得成都取滇南由建昌一路有大小象嶺之險有瀘河金江之阻又蠻彝雜處之地得之最難者如四川有建昌可下雲南而雲南有建昌可窺四川實爲必爭之區此臣克取成都之後進取不敢少緩旣取之後又慮兵多一時無糧兵少久則難守皆因川東未取遵義湖廣之兵未入貴州以致遵義之賊敢於鴟張來犯永寧而永寧乃滇黔門戶四川緊要關口一有差失則瀘州敘

府馬湖不保成都震動矣臣又何敢岐視且成都省會新經克復實爲根本重地尤難輕忽除永寧遣發官兵擊賊餘孽尚未退散經臣

題報在案今建昌官兵復仰仗我

皇上天威擊敗攻城之賊雖逆勢尚在狂逞而叛弁旣誅人心已定援兵一到不難撲滅所有建昌官兵堅守城池逆賊攻城退敗情形理合先爲題報伏乞

皇上睿鑒施行康熙十九年五月初二日奉

旨兵部議奏

查獲賊遺馬騾補給分賞疏

題爲官兵倍道追賊浮水過江馬匹損傷數多謹  
報明各案得獲馬匹就便補給以節

國用以收速效事竊臣自十八年十月初九日督  
率官兵攻克密樹關十三日大敗逆賊恢復徽  
州未敢久停十七日發兵復敗賊於打火店王  
家臺等處二十五日破白水江之險浮水過渡  
二十六日大殺逆賊於八堵山二十七日恢復  
畧陽并遣遊擊李尚翠等追殺逆賊克取陽平

關叅將呂自魁等於沔縣一路東山擊敗逆賊其間山險水滑與賊步步攻戰據各官查明前後當陣傷斃及滾崖跌死水溺馬共計四百二十八匹又自十二月二十六日寧羗分路二十八日渡陽平關江十九年正月初一日於白水壩大江鏖戰奪險浮水過渡初三日大敗青川之賊初四日追殺於青箐山初五日又復敗逆賊於舊州明月江初十日克取成都十日之內跋涉二千里山險徑仄無分晝夜倍道兼程馬

匹陣折水溺滾崖擦掌癢跛損傷丟棄者今據各營官兵開報共計六百四十四匹臣思官兵馬匹倒斃例應開報請領茶馬然官兵現在征勦急須馬匹非平日無事營伍可比臣又何敢拘執定例請討官馬而誤進勦機宜若令各兵賠補不但窮卒無力抑且現在責以用命正當加意鼓勵斷難勒令購補臣只得將前後得獲馬匹行令各官不許私匿着令盡數查出某營得獲馬匹若干就准補該營傷折馬匹又漢兵

素無馱馬今既欲令其迅速追賊凡帳房鑼鍋食米等項難以自帶臣又不得不將先鋒以及挑選頭敵破陣官兵量給馱馬以期速効查自恢復徽州畧陽陽平等處得獲馬七百一十四匹於畧陽起行時補給缺馬兵丁餘者分散各營作爲馱馬并騾三十七頭撥給火器官兵馱載大砲鳥機今查自破白水壩青川龍安舊州等處以及克取成都沿途得獲并查出其騾馬二千一百八十三匹頭內補給各兵六百

四十四匹再成都接誠兵丁前因地方初復所騎馬匹一併清查今奉

旨留三千名隨臣進勦照漢中事例馬二步八應設馬六百匹亦應照數撥存以備征勦至建昌永寧兩路正在用兵往來緊急差報地方甫定全無驛馬若俟題

請安設安能濟急臣亦量撥馬一百二十匹酌量安設又補給各官兵馱馬二百匹其餘剩馬騾六百一十九匹頭并投誠官兵暨民間自首以及

查出逆賊男婦人口共二百一十五名口臣因痛禁官兵不許搶掠而奮勇破險直前官兵宜當鼓勵除臣給鞍馬什物銀牌外將此項馬匹人口按隊分賞有功官兵訖此臣心切滅賊急在鼓勵兵將相應一併

題明伏乞

皇上睿鑒施行康熙十九年四月二十八日奉旨覽卿奏進勦川賊以來得獲馬騾二千餘匹撥給兵丁驛遞有裨軍務可嘉知道了該部知道

官兵應援永寧飛報大捷疏

題爲飛報大捷事案照逆賊侵犯永寧官兵兩經擊敗堅守孤城併微臣續遣官兵星馳應援緣由業經

題報在案今於康熙十九年四月十五日據臣標左營遊擊龔玉柱秦州營副將楊三虎興武營遊擊吳志西寧鎮標遊擊屠存義隨征總兵李芳述鄒九疇王夢楨張友成劉魁汪時瀨塘報竊照僞將軍尤廷玉王邦圖高元烈等聚真武

山連營五座屢次狂逞情形業經塘報在案今於四月初八日寅時分逆賊尤廷玉等統領馬步官兵約共五千有餘過正南橋蜂擁遶路上復過清水河直登永城南山轉沙灘子藍家橋南壇寺北壇分股站隊卑職等會同公議以貴州城與賊營相近議總兵鄒九疇帶領官兵固守其四川城議副將楊三虎帶領官兵防禦大西門總兵汪時瀨帶領官兵把守南門署敘永管糧同知顧耀祖永寧衛守備蕭鳳原任永

寧衛守備馮加官帶領軍民把守小西門上下北門卑職等會議各鎮將率領馬步精兵出城撲勦賊兵分作六股齊進三股由曾家營而出據團山一座妄意欲攻西南二門三股由南壇寺北壇之左右欲抄我官兵之脇又觀音閣夏家灣一路逆兵分作三股至大東門欲攻貴州一城卑職遊擊龔玉柱帶領馬步官兵由大西門直抵團山之前總兵劉魁帶領馬步官兵從小西門直抵團山之左遊擊吳志帶領馬步官

兵出小西門直抵團山之右遊擊屠存義帶領馬步官兵出南門直抵北壇之左總兵王夢楨帶領馬步官兵出南門直抵北壇之右總兵李芳述張友成各帶領馬步官兵出南門直抵南壇寺賊兵三股而上卑職總兵李芳述王夢楨張友成遊擊屠存義帶領官兵當頭迎敵從寅至巳連衝三陣卑職等勉勵官兵均矢肝腦塗地之心協力奮戰由是賊兵三股直敗下河斬殺及過河落水死亡無數賊營真武山又新到

偽張將軍統領賊兵合夏家灣觀音閣之逆兵三股喊聲震地直攻貴州城東總兵鄒九疇嚴督官兵鎗砲齊發賊不能支退至營前惟團山之賊兵三股卑職遊擊龔玉柱吳志總兵劉魁率領官兵三面攻打連衝七次自寅鏖戰至未逆賊居高恃險死守不退卑職等隨即下馬親督步兵齊擁前進復催馬兵從旁一躍而上矢石交加賊遂披靡大敗倒戈奔潰馬兵飛逐下河步兵從旁截殺當陣斬傷溺水者共有千餘



卑職總兵鄒九疇卽發遊擊李勝鳳陳應先千  
總郝承恩永寧鎮右營遊擊段尚秀守備段虎  
等帶領官兵打緣旗八桿開大東門一擁而出  
直踰真武山左之磨盤山奪其小營順梁而下  
遊擊龔玉柱屠存義帶三桿旗馬兵轉入南門  
復出貴州城大東門卽從中路而進直逼真武  
山總兵李芳述張友成王夢楨劉魁遊擊吳志  
尾追過河徑攻真武山右路而上總兵鄒九疇  
復率步兵從磨盤山下左脇而入漫山遍野直

搗賊營官兵奮勇無不以一當百連踏賊營五  
座勢如拉朽摧枯職等追殺十里至地名乾溪  
見天色已晚遂收兵回城是役也官兵戮力將  
士齊心三戰三捷遂獲全勝實皆

皇上恩施本將軍德威遠播之所致也從此振旅長  
驅逆賊成擒在邇除所獲各逆劫掠民間妻女  
隨出示俱令百姓認領外至於得獲大纛小旗  
令箭鎗砲盔甲腰刀馬匹活擒逆賊俟容差官  
解驗其在事有功人員以及傷亡官兵另冊申

報今將大捷情形理合飛報等情到臣該臣看  
得四川係滇黔之半壁永寧爲三省之咽喉逆  
賊効死復來鷓張狂逞者其意在圖川蜀其勢  
在固滇黔也今仰仗我

皇上天威諸將士戮力大敗賊衆而堅守孤城首在  
遊擊龔玉柱才智勇敢總兵李芳述忠心不二  
繼則遊擊屠存義吳志副將楊三虎總兵鄒九  
疇王夢楨張友成等統率官兵星馳應援合力  
撲勦克奏大捷除臣差員前去獎賞官兵令其

益加奮勉外其殺賊有功人員併傷亡官兵得  
獲盛甲馬匹器械等項以及生擒逆賊俟解到  
查明另爲

題報所有官兵大敗賊衆克捷情形相應  
題報伏乞

皇上睿鑒施行康熙十九年五月初七日奉

旨據奏遣發官兵於永寧地方殺敗逆賊可嘉着議  
奏兵部知道

獎薦僞員以勵後効疏

密題爲歸誠僞員黽勉圖功已見成效懇請

聖明特沛

殊恩以酬忠順以示激勸事竊照逆賊侵犯永寧官  
兵前後擊敗情形并總兵李芳述不受僞勅僞  
印舉首逆書等緣由俱經微臣

題報在案今復據總兵李芳述稟報內稱本年四  
月初三日申時分僞營差人將竹桿夾文書一  
封挿於大東門外卑職以逆賊屢次書文無非

奏疏存彙 卷之三  
引誘煽惑隨即請各官齊集大東門城上開門  
令人取來公看係僞上諭二道僞將軍尤廷玉  
王邦圖高元烈與卑職書一封內有僞威遠大  
將軍胡國柱與卑職密書二紙胡國柱又與總  
兵鄒九疇蔣榮德僞密諭一紙卑職誓圖歸正  
以報

國恩豈聽狂悖誘惑謹此首報其僞上諭未敢開  
拆今將原封同尤胡各逆等僞書一併固封呈  
覽等情到臣該臣看得總兵李芳述久歷戎行

才識俱備膽勇兼優前僞諭催往保寧能不受  
命獻城來歸可謂見幾今統率官兵應援永寧  
身先士卒戰守得宜至於僞諭逆書或妄陳利  
害以悚其心或餌以將軍事權以奪其志該總  
兵誓切滅賊出首逆書不獨才識超羣忠義可  
嘉而堅貞果敢不爲搖奪之心志與奮勇勦賊  
克奏捷功之勤勞雖臣前疏兩經奏

請誠恐未竟所長臣叩懇

聖明俯念新復疆土首在得人將李芳述

特加殊恩准以總兵實銜

勅部給劄食俸隨征使其統領原管之兵爲

國効力庶人人皆知勉勵圖功將効順之恐後矣  
所有送到僞諭臣會同將軍臣吳丹俄克濟哈  
拆閱并逆書總出餌誘煽惑狂悖不遜之語除  
咨送兵部外相應具

題伏乞

皇上睿鑒勅議速覆行臣遵奉施行康熙十九年五  
月初十日奉

旨兵部議奏

接任雲貴總督謝 恩疏

奏爲謹報明微臣遵

旨受事日期恭謝

天恩事康熙十九年四月二十五日准吏部咨文選  
清吏司案呈奉本部送吏科抄出勇畧將軍趙  
良棟奏前事康熙十九年三月十七日奉

旨卿才品優長夙鎮巖疆勞績素著簡任雲貴總督  
正資料理着祇遵成命不必控辭該部知道欽此  
欽遵抄部送司案呈到部移咨到臣念臣老病

情真總督任重理當據實再爲陳請叩懇  
俞允以安愚分今復蒙

恩諭臣思逆孽現在負固雲貴尚未開復正臣子恢  
疆滅賊之秋敢不黽勉受

命竭盡駑駘以仰副我

皇上宵旰未釋之心於萬一也耶謹於二十六日祇  
遵受事外所有

御塘齋到微臣坐名

勅書一道臣郊迎至署因具疏控辭未敢開讀今祇

遵

成命恭設香案望

闕叩頭謝

恩開讀訖相應一併

奏明伏乞

皇上睿鑒施行謹具奏

謝以

聞康熙十九年五月二十七日奉

旨覽卿奏謝知道了該部知道

密陳統馭官兵情節疏

密題爲

君命不當固辭兵心難容渙散謹陳明統馭情節仰  
祈

睿裁事竊思恢疆滅賊雖在將謀而摧鋒陷陣一惟  
士氣查寧夏邊地素號強兵之所苟駕馭失宜  
不獨不能爲用抑且驕悍難馴稽之前代不百  
年間叛亂四次卽我

朝順治三年殺巡撫繼而惠安害提督亦已兩經變



故矣再如固原不過門庭之寇不戰而走豈可驅之遠征臣三年訓練痛禁扣餉申嚴紀律恩威教養費盡心力始成一旅勁兵實非容易故臣敢有微臣年歲漸老願當一路進勦之請在所恃者此兵也及至清水日切切於喂養馬匹日切切於繕治器具當諸路尚在觀望惟寧夏官兵實心言進此又學士內臣所日擊諒亦啓奏已在

聖明洞照中矣至於蜀道險阻自古稱難去冬攻克密樹關恢復徽州畧陽陽平不再旬而全秦底定今春長驅入川倍道兼程其間披重鎧以渡狂瀾穿荆棘而歷鳥道步步與賊攻戰不十日克取成都所恃亦惟寧夏官兵在前是寧夏官兵樂爲臣用已有成效而臣非寧夏官兵無以克捷奏功確有明驗所以臣之前疏願以原官仍統原兵隨師進勦者意出真誠非敢以浮泛之詞欺

君父而自欺也今重荷

皇恩溫綸疊煥臣又不得不黽勉受

命但寧夏官兵未經議及臣萬里遠征無所適從如謂雲貴尚未開復督標營制未經預設雖有隨征總兵官兵不過暫爲改克又遠在湖南令臣仍統寧夏官兵進勦則寧夏員缺暫停不推庶兵心歸一而臣有此相信之兵隨師遠征可收臂指之用倘以臣旣受雲貴之

命督標官兵令臣另爲

題設或謂已有湖廣隨征總兵官兵其寧夏員缺

或提督或總兵另行推人不獨微臣

題設改撥爲難而新經推補之人使統寧夏官兵遠道進征亦恐兵將驟難孚合卽或再奉

綸音使新推提鎮隨臣進征聽臣指揮而官兵多一層管轄隔一層親切增一番內顧惑一番人心事權不一心志難齊况前進四川誰不懼其深入今言雲貴誰不畏其路遙臣之愚見今此進征首在寧夏官兵爲最重爲切要萬一渙散其心臣雖有枕戈待旦滅賊朝食之血誠其如呼

應不靈指揮莫措又何以奏蕩平之效耶此臣所以輾轉思維不得不亟爲請

命以一兵心者也仰懇我

皇上俯念進征爲重時方用兵或准臣前疏懇辭仍

以原官統領原兵力圖進勦將雲貴總督另

簡賢能或蒙

特旨官兵仍聽微臣統領進勦而寧夏員缺暫停不行推補俟雲貴恢復之日官兵再議回汛提鎮員缺再議補人另爲請

旨或別蒙

聖裁臣未敢擅便總之臣以滅賊恢疆爲重兵將得心得力爲要也伏乞

皇上俯賜電鑒勅議速覆行臣遵奉施行康熙十九年五月二十一日奉

旨已有旨了兵部知道

永寧復敗逆賊大破勁敵疏

題爲官兵奮勇大破勁敵謹再報明斬獲情形仰

祈

睿裁俯鑒加恩以勵將士以期後効事竊照本年四月初八日永寧官兵殺敗逆賊飛報大捷前來臣接據塘報業經繕疏題

聞在案嗣於四月二十四日復據遊擊龔玉柱總兵李芳述等報稱本月初八日大敗逆賊彼時因官兵分頭追勦擒獲賊衆尚未到齊又陣斬逆

賊屍橫遍野一時不及細查止將大畧情形先爲具報外查此案逆賊陣勢勇猛較前大不相同竟日鏖戰拚命死敵連衝數十餘次不離山頭卑職等見賊占高又且逼近城門若一天晚難以收兵遂傳官兵各下死力惡戰卑職等領兵官在前各認一面不顧身命總兵李芳述副將蘇虎王之俊郭騏蘭州營守備陳英撫標千總張憲載奮勇先登逆賊方始大敗當陣斬殺實有千餘生擒七十二名我之官兵傷亡亦多

今審據逆賊李環張鳳鳴楊泗等供認陣前斬殺總兵一員毛友貴副將三員劉瓊許三虎蕭從福叅將涂瀚遊守千把百十餘員尤廷玉王邦圖高元烈身俱帶傷大散奔逃又審問陣獲大旗小旗多係銀頂紅纓金蟒據供黃旗金蟒原係藩下右固山後改前將軍的旗號因吳國貴死了將小的們遼東舊人一半分與胡將軍去遵義一半王邦圖領着在貴州因尤將軍請兵將小的們纔發來二月十一日自貴州起身

三月十三日到永寧又問原是多少舊人據供小的們在右固山下原是四千甲改了五鎮後又各處抽拔了一千共五千六鎮遵義去了三鎮王邦圖領來永寧也是三鎮二千五百甲又問此來賊兵多不止二千五百供稱尤將軍領的是三千白遵義來的并高將軍有七八百人都是各鎮上的兵不係藩下舊人還有箇撫彝王將軍在畢節領的安順來的兵黑將軍在生界壩領的是檔下的逃兵還有黔西大定威寧

兵未到等語除陣獲九子砲二十七位拐子鎗交鎗二百九十八門存營給兵應用所有當陣得獲大旗二十八桿小旗二百五十三面紅藍旗二面令箭九枝偽劄九十七張偽勅諭火牌勘合糧單本章文移通共四十一件玉帶二條并生擒逆賊七十二名相應押解其劔刀腰刀弓箭鐵綿盔甲馬匹尚未查明收齊俟查明收齊另爲冊報至於傷亡官兵容卑職等逐一查明分別輕重另冊呈報等情到臣臣卽會同建

威將軍臣吳丹振武將軍臣俄克濟哈等四川督臣楊茂勳撫臣杭愛齊集公所審問李環宋希堯王可俸等二十名供稱皆係遼東人原在吳國貴下披甲吳國貴死了一半分去遵義半王邦圖領來永寧二月十一日自貴州起身三月十三日到永寧等語隨發布按兩司逐一細敘口供據稱審得李環等二十名俱係遼東舊人先在右固山吳國貴跟前因吳國貴在湖廣武岡州被砲打死了而今在僞將軍王邦圖

跟前又問前日永寧打仗有幾箇將軍帶領多少兵馬供一箇尤將軍一箇高將軍一箇王將軍連喻黃楊毛八九箇總兵共有七千多人二千多馬問這一陣殺了賊兵多少供陣上殺了我們見過的有七八百不止還有河裏淹死的山上跌死的我們眼裏未見不敢說又問爾們打的甚麼旗號供是黃旗白旗現有解來大小旗幟可驗問賊兵共有幾座營盤供有五座營盤俱被大兵躡了又問楊泗盧進忠王國相等

五十二名據供皆係僞將軍尤廷玉高元烈下的兵俱是各鎮上的不是藩下舊人當陣被擒是實等語兩司審單口供俱同臣等仰體

皇上好生之德將擒獲賊兵槩行免死剃頭發營安插外該臣看得逆渠構亂於茲七年竊踞我疆土蹂躪我生民處處稱兵致煩

天討如自去冬以至今春漢南川蜀捷報頻頻斬殺俘馘極多可謂大挫其鋒然未似永寧一捷生擒斬殺若此之多且李環等皆遼東舊人而旗

幟製造不同其爲勁旅也明矣再逆渠僞勅十道謄言永寧爲重觀其詞語勢窮力盡危在至極從此一敗益見心寒膽落所有官兵仰仗皇上天威十分用命戰功不可泯沒亟宜請旨加恩以勵後効以示鼓勵至總兵李芳述歸誠後功勞尤著合併敘明叩懇

皇仁勅下從優議敘使行間將士暨投誠各官人人奮勇爭先効力者在事有功人員及傷亡官兵俟冊報到日另疏題



奏疏存彙 卷之三  
請得獲逆賊偽勅火牌文移等件送部外臣謹會同  
將軍臣吳丹俄克濟哈督臣楊茂勲撫臣杭愛  
合詞具

題伏乞

皇上睿鑒勅議施行康熙十九年六月初十日奉  
旨官兵於永寧地方殺敗逆賊可嘉及李芳述授爲  
隨征總兵官俱已有旨了兵部知道

遵 諭再遣官兵堵勦疏

密題爲報明遵奉

上諭再遣官兵堵勦暨逆賊兩路出犯情形并陳進  
滇兵數糧運仰副

聖懷以期克効事四月十七日接准兵部密咨奉  
上諭川省與雲貴接壤通路甚多逆賊必來侵犯關  
係重大昨據總督將軍趙良棟報我官兵已抵金  
沙江宜行總督將軍趙良棟將軍吳丹俄克濟哈  
等在各處要路俱令立營挖壕砌壘堞口於此進

取之間令其固守所守官兵糧餉運送勿誤欽此  
仰見我

皇上重念封疆

睿慮周到查滿洲馬匹尚瘦原進川東漢兵俱在保  
寧而臣敢不以滅賊恢疆戰守爲重耶如該鎮  
將前報因降弁復萌叛念放賊過江已經擒斬  
繼報殺敗攻城之賊業經

題報在案臣復慮建昌切近雲南爲賊必爭之地  
已四次遣發過官兵五千旣奉

上諭復發兵三千計前後五次遣發過叅將呂自魁  
遊擊鄭有榮總兵胡振雄王好文王進才藍兆  
周遊擊柴英趙光榮馬登仕趙元輔馮德昌趙  
魁英王洪仁等帶領官兵八千員名矣又永寧  
逆賊出犯臣不敢以兩路岐視亦遣遊擊龔玉  
柱總兵李芳述鄒九疇張友成王夢楨副將楊  
三虎王之俊遊擊屠存義吳志等前後三次計  
發過官兵四千員名矣今永寧逆賊惡戰死敵  
已被官兵殺敗而建昌逆賊檯檔木驅象隻雖

我兵奮勇屢有擒斬尚未大破其衆而臣原進川西一路漢兵一萬三千除去兩路遣發一萬二千加之防隘塘撥不獨成都無官無兵抑且滿漢官兵俱沾奉

旨養馬之實而臣之官兵當此酷暑炎熱總未停歇永寧逆渠王邦圖尤廷玉高元烈等賊旣經殺敗遠遁地方係將軍臣吳丹統領原進川東漢兵應進之路臣已會明將軍臣吳丹俄克濟哈遣發總兵費雅達帶領所部官兵并咨會提督

臣王之鼎帶兵前赴永寧接防所有臣遣勦賊官兵四千應行撤調回成都暫喂馬匹聽候續發建昌進勦相應一併

題明至於進取滇黔以臣所計賊勢雖敗然其餘孽舊人尚多即使不顧其主而伊之父母妻子豈有槩置不顧者乎若我兵而厚用之得當彼衆不降更何所往若我輕忽視之用之不當則彼衆必拚命死戰不第雲南原係賊巢不可輕忽卽進建昌永寧兩路地方率皆苗蠻彝猓到

處關隘要路須當留兵防守而留防之兵又非  
三二百人可以扎站且廣西進兵隔遠不敢必  
其前後而四川兩路亦甚窳遠難以接應一路  
有事止可顧得一路遇有險阻各須自爲努力  
先到更須獨當一面此臣諄切言之者總欲克  
捷迅速計出萬全每路二萬漢兵實不爲過也  
且如前進漢南由興安一路除滿洲之外綠旗  
漢兵一萬復有總兵程福亮帶兵二千接應棧  
道一路綠旗漢兵一萬二千復有總兵高孟帶

兵二千接應小川子一路除滿洲之外綠旗漢  
兵一萬復有總兵朱衣客帶兵二千接應微臣  
進八堵山一路綠旗漢兵五千二千接應是通  
計綠旗漢兵四萬五千員名矣漢南尚用綠旗  
兵四萬五千而進取雲貴用兵四萬又豈爲多  
况係已用之兵數大將軍

題報可查倘臣言不謬仰祈

睿裁勅下大將軍陝督照數撥派速發軍前以重進  
勦以期速効者也臣復有請者建昌一路大兵

行糧應在成都嘉眉邛雅瀘等州運送不獨苗蠻烟瘴之地且有大小象嶺瀘江之險其間輓運須步步防護庶保無虞又川民刁玩疲敝素稱難治必須能員率兵押送今川糧交與四川總督巡撫運送勿誤已經奉

旨如撫臣杭愛標下尚無招兵督臣楊茂勳既抵成都帶有現成標兵應遵嚴綸協同撫臣督運川糧星赴建昌勿使有誤如臣等前議督臣在重慶者原以遵義未復督臣現

在重慶今湖廣官兵已取辰沅可以直下貴州而遵義之賊不戰自遁况順承王旣駐重慶督臣可以停其復去以免往返當遵

旨就近料理川糧以專責成統聽勅議緣係報明遵奉

上諭再遣官兵堵勦暨逆賊兩路出犯情形并陳進定雲南兵數糧運以期萬全事理貼黃難盡伏乞

皇上睿鑒全覽

勅部施行康熙十九年六月初六日奉  
旨議政王貝勒大臣會議具奏

奏疏存彙卷之三終